



湖廣通志

鄉賢

五十

內閣文庫	
番號	漢 14208
冊數	100(49)
函號	史 130 1





湖廣通志卷之五十

鄉賢志

長沙府

宋畢田楚紀長沙人真宗朝以吏部郎官兼王府侍讀

一日遇講洵寒奏蠲臨湘七郡課租里人德之

孫方武詳忠臣志

袁顯詳忠臣志

丁仁楚紀醴陵人擢進士第參謀淮蜀制幕及高沙之

變仁諭以順逆降之知無為軍依城築堰郡人感德名

曰丁公堰繼解合肥之圍進知太平軍湖北漕使退居

二十年卒年八十四

元許穎

詳孝子志

明夏原吉李東陽夏忠靖傳原吉字維禎其先會稽人祖希聲元季爲湖廣行省都事國初占籍湘陰父時敏湘陰教諭原吉領鄉薦升國子生入禁廡書誥赦太祖見字格方正賜緋衣復遣人察諸生獨原吉端坐正書心念之書滿當署職上曰原吉端厚特授戶部主事擢右侍郎巡撫福建太宗入定大統進尚書凡貢賦役法悉命詳定原吉酌古今議多從厚曰不可使後難繼困吾民也兩浙大水三命原吉往治至則奏罷蠹民妨政數十事諏訪者宿相度地勢疏河導渠修築隄堰俾水歸於海又奏發廩粟三十餘萬石所活不可勝計乃分

給卞種督之耕種吳人至今懷之三年還掌部事請裁冗食節浮費又禁鹽鈔法諸弊凡水旱必奏請蠲租稅扈從幸北京復命兼掌刑部二指揮昌支官糧上欲斬之原吉曰罪自有律若實盜者何以加諸乃止八年上親討北邊命輔太孫留守北京諭之曰朕以房元齡委卿矣從太孫周行鄉落取民醵黍以進曰願知此味九年考績上晏於便殿諭羣臣曰原吉乃太祖養成賢德欲觀古名臣此其人也大臣科道言南北建都便利不同上令廷辨原吉曰臣等罪也科道言是或尤其背初議原吉曰吾輩歷職久言雖失幸上憐之若言官得罪所損多矣衆始歎服上議親討北邊羣臣莫敢言原吉

約尚書方賓同諫遂獲罪籍其家惟賜鈔千貫餘皆布
衣瓦器召還問征敵得失執不變仁宗踐阼加太子少
傅進少保洪熙元年賜銀印一其文曰繩愆糾繆有封
奏則以識之象印一文曰正直以便處分宣德三年賜
範金銀印八其一曰含弘正靖扈從巡邊上取原吉等
糗糒嘗之曰卿亦食此乎對曰臣得此食足矣隨營將
士多餒者遂撤上供物以賜且徧賜將士上念原吉等
春秋高特賜勅解部務俾專論道而顧問益親寵賚稠
疊不可殫述上嘗製玉冠二枚以其一賜原吉曰使卿
子孫知吾君臣一體也卒贈特進光祿大夫太師謚忠
靖賜祭殯葬皆越常典官其子瑄爲尚寶司丞命戶部

蠲戶役後官至南京太常少卿孫崇文舉進士爲南京
吏部郎中皆賢而有文世其家

夏瑄 見上

易先 詳忠臣志

彭謙湘陰人永樂丙戌進士巡按四川有豪右置私獄
錮人又有僧掘地匿婦女謙廉得之悉按以法尋以四
川左叅議致政有詩文行世 見舊通志

曹弘明一統志字文淵益陽人永樂乙未進士授刑部
主事尋陞員外郎恭慎有聞宣德間進右侍郎巡撫淮
南安靜不煩雖貴顯清苦如寒士

易綸楚紀益陽人宣德中舉於鄉拜監察御史獨立敢

言忤權貴謫教宜川尚書江淵贊曰其進可取卿相而
言動蹇蹇其退可式後學而楷模循循

羅琥明一統志茶陵人正統時爲南陽別駕積粟麥三十萬石撫綏流民萬餘戶築封邱隄八十餘里陞知衢
州府以擒賊功進南京戶部郎中攝部事諸司咸祇令
焉

劉憲明一統志字廷試益陽人成化戊戌進士拜監察
御史巡撫寧夏召募精銳奏捷花馬池賜金帛後忤逆
瑾逮繫詔獄卒

羅安楚紀益陽人成化戊戌進士授戶部主事出補屯
田僉事歷貴州參政遇事多所建明備兵瀘州功績尤

偉

羅鑒楚紀茶陵人成化戊戌進士授南京刑科給事中
起復補戶科弘治初疏上隆輔養保初政廣儲積三事
出爲廣東參議歷四川布政使均賦役練戎政撫孤獨
不爲赫赫名而人被實惠擢副都御史以忤劉瑾罷瑾
誅起巡撫以病致仕年九十卒

黃寶何孟春集字廷用世爲長沙鉅族寶隨父官閩中
方成童緝學著文迥絕時輩成化甲辰舉進士觀政戶
部承檄餉銀寧夏當道聞其操守選授吏部驗封主事
謹厚純約一命卽精吏職遷員外郎進郎中惟清惟植
寶不愛寶之言傳播胥隸尊陞太常少卿轉右通政正

德丁卯遷應天府尹除苛剔蠹條教一新畿民時苦旱
災通歲入萬餘寶節縮出納通融補助公私兩濟用薦
為右副都御史巡撫陝西至鎮宣上德誨民隱舉軍法
飭邊備西安大旱出令有司減釋囚滯祈禱神祠雨應
時浹注漢中賊蠹起聲勢甚熾寶分兵擒捕多所斬獲
餘黨就撫秦地以寧會闕瑾擅權或勸通賂遺不答以
是忤瑾懼及禍委政去瑾敗言官交章薦任巡撫月餘
旨從中出令致仕世廟嗣統名為吏部左侍郎卒賜祭
葬予恩蔭

劉端 詳孝子志

易舒誥 姓譜 攸縣人弘治乙丑進士選庶吉士授檢討

詞翰為時所重逆瑾怙威人皆爭附之舒誥不屈改南
京戶部主事瑾敗復入翰林以親老歸養家居十四年
杜門却掃娛親之餘雅善吟咏著有西泉集

徐廷用 楚紀 字良佐醴陵人弘治癸丑進士任戶部主
事督都城商稅通州倉儲及內監諸場芻秣事夙夜勤
勩力拒請托甲子都御史閣仰宇往理宜大邊儲廷用
督餉以從悉力區畫令不煩而事集遷員外郎所著有
東曹奏議

周采明 一統志 寧鄉人嘉靖己丑進士歷禮科都給事
中端雅沉毅敷奏務持大體出補參政歷四川左布政
使踰六年進副都御史巡撫雲南以鎮靜得民

李棠李幼滋李棠碑字世叔長沙人初領鄉薦適父病
亟請於天以身代不得哀毀廬墓父遺券千金焚之中
嘉靖戊戌進士歸取古今書閉戶讀之且十年始出拜
禮部主事累遷太常少卿都察院右僉都御史兩廣山
寇煽亂陞副都御史鎮撫南贛汀韶等處節制四省上
安邊六策先定謀而後戰摧劇賊殄滅之地方底寧轉
南京兵部右侍郎仍躬歷要害處設防守以善後圖去
之日男婦襁負遮道士民建祠以祀尋轉南京吏部右
侍郎乞歸卒賜祭葬

鄧巍瀏陽人嘉靖辛丑進士任溧水令擢南考功敬歷
郡守藩臬皆以卓異聞與高拱張居正爲舊交務自遠

嫌終不究用年八十五卒

見舊通志

周之屏三楚文獻錄湘潭人嘉靖己未進士授溧水令
陞知吉安府屬有流賊之警借浙兵捍禦兵素暴與郡
人睚眦叫譴入府門皆露刃僚吏散走之屏嚴鼓升堂
諭以禍福皆投刃拜一郡獲安擢廣西布政使張居正
議欲丈量守令言搖撞田不可問比入覲合言於朝張
厲聲云只管丈之屏遽揖而出守令或問故之屏曰相
公方欲整齊法度肯明言田不可丈耶伸縮在我輩耳
弟之翰嘉靖己卯舉人歷四川僉事之基萬曆癸未進
士歷邵武太守並祀鄉賢

周之翰

見上

周之基 見上

譚希思茶陵人萬曆甲戌進士初任萬安縣調令永豐
皆有惠政擢南畿御史抗疏六事降謫復內擢歷陞順
天府丞晉僉都御史巡撫四川時播州逆節方萌廷議
主勦希思主撫遂去職居鄉以清介稱

莊天合長沙衛人萬曆己丑進士改庶吉士授編修侍
講筵晉宮僚以端謹受知於光宗庚子主試南都甲辰
分校禮闈所拔多知名士累進少詹事丁外艱歸卒贈
禮部右侍郎賜祭葬子以臨蔭授中書舍人 以上舊通

李騰芳湘潭人萬曆壬辰進士改庶吉士授編修好學
負才名三王並封旨下騰芳為書詣朝堂投大學士王

錫爵錫爵憮然遂反並封之詔朝鮮復用兵上安攘八
策累遷左諭德光宗立擢少詹事旋拜禮部侍郎尋改
吏部加禮部尚書魏忠賢惡騰芳與楊漣同鄉矯旨削
奪懷宗起掌部事卒贈太子太保 明史稿

劉弘化長沙衛人萬曆庚戌進士兩令山西以循卓稱
擢刑科給事糾輔臣附權宦內臣僭批荅及移宮紅丸
兩案皆人所難言魏璫屢興大獄具疏力爭熊廷弼方
擬大辟弘化復以公揭保之璫誣以受熊賄萬金按追
窘甚璫敗仍以兵科給事晉太常卿轉南大理旋告病
歸請減長沙府例外派銀五千餘兩潭人至今懷之 見

舊通志

洪雲蒸 詳忠臣志

羅喻義益陽人萬曆癸丑進士改庶吉士授檢討天啟初累遷南京國子祭酒諸生欲為魏璫忠賢建祠喻義懲其倡者乃已忠賢黨輯東林籍貫湖廣二十人以喻義為首懷宗嗣位召拜禮部侍郎克日講官喻義見中外多故將吏不習兵銳意武事因言武有七德豐財居一明年進講尚書撰布昭聖武講義中及時事語侵執政喻義雅負時望為溫體仁所傾卒謚文介 明史稿

周耀冕寧鄉人萬曆己卯鄉薦任東平知州陞延安同知築泃水之隄以扞黃河搗鄜崖之巢以靖邊圉 見府志

謝肇元湘潭人天啟乙丑進士初知嘉定州請減浮糧

者祥刑錄晉戶部郎剔弊釐奸兵餉取給分校蜀闡典試滇南皆稱得士擢曹漢兵備時值寇警屢捍危城加大參進廉使督餉治兵威懷克著卒贈太僕

吳應台湘陰人以進士授浦江令時金華義烏頗有寇警應台練兵捍禦賊不敢犯境有冤誣兩獄應台立為昭雪 以上舊通志

陶顯位 詳文苑志

陶汝兼 詳隱逸志

皇清胡爾愷字石江長沙進士經畧洪承疇以山林隱逸薦特授吏科給事中在諫垣一載章屢上皆中事窳其言湖南彫敝尤切歷吏部右侍郎遷禮部左侍郎

臥疾尚陳四事平催徵禁營造革夫輜抑侵漁俱蒙
俞允未幾寓京邸貧無以斂士大夫為經紀其喪以歸

趙開心字靈伯長沙人由進士特授陝西道御史有

鯁直聲

世祖皇帝特重之擢僉都御史晉左都凡值疑獄抗疏剖析

總領臺憲風紀肅然尋降補太常卿復晉工部尚書

兼總督倉場卒於官賜祭葬遣官護喪還里

周應遇字鶴泉善化人以歲貢生佐經畧洪承疇幕

薦補雲南洱海僉事有清譽三載告歸以山水詩文

自娛著友水軒集以上俱舊通志

彭之壽寧鄉人康熙四十年以貢選南漳縣訓導閱

五年告歸之壽篤勤於學善引掖後進及門登仕籍

者多良吏族黨貧乏者傾貲顧卹未嘗有德色

曹景星詳義士志

衡州府

明陳翔鄱人成化癸卯領鄉薦授翰林院博士出知普

安州州苗民雜處守下車例有餽遺翔力却之遂歡服

後家居故人有孤女無所依翔撫育厚嫁遣之見舊通志

劉泰鄱人太學生歷嘉善合肥丞擢東阿令不赴歸與

邑人講學多所造就任嘉善時督郡課十餘萬例有羨

金泰悉罷卻請以克明歲正供有旨旌賞合肥有巨鐘

泰請築城又立社學民深德之見舊通志

蔣福陵明一統志衡陽人正德甲戌進士初令鄞政尚
豈弟催科不擾擢太僕寺丞出知杭州府公廉寬裕始
終一節

劉黻明一統志衡陽人正德丁丑進士授行人諫武宗
南巡謫南京國子助教嘉靖初復職尋擢御史屢建危
言宦戚斂手出按四川禁中貴專擅復蕪氏侵田以終
養告歸

劉堯誨三楚文獻錄字君訥臨武人爲人沉毅寡言登
嘉靖癸丑進士令新喻擢南刑垣適倭勢且薄畿甸堯
誨抗疏論總制胡宗憲失策謂功罪不明賞罰惟貨天
下事大可憂者疏入分宜銜之又浙直以備倭故凡均

徭銀俱先三年辦名曰提編法民困甚堯誨抗論巧取
民不若拙省費罷興作省冗兵內外供應尚衣寺人多
冒破宜裁覈權貴人皆側目因引疾歸粵寇犯臨武率
子弟禦之又募艾家兵爲外援從間奪賊所豎旗賊驚
引去起爲僉都御史撫八閩設方畧殲巨寇林鳳黨並
擒倭朶麻哩諸衆又奏設南澳總兵扼斷賊巢進副都
御史再撫江西疏蠲積年逋餉二十九萬零擢少司馬
兼御史中丞督師兩廣諸將士以縱賊林道乾伏法堯
誨言法不及文寮非所以示公竟按海防官不少貸於
是流賊相繼輸款又定羅旁兩猺狼調土兵定粵西入
寨酌善後七策又條畫粵西鹽法使湖南民不苦鹽嶺

東兵不苦餉陟南戶兵兩部尚書子告歸所著有督撫奏議治河三議虛籟集臨武志

朱炳如衡陽人嘉靖己未進士官行人奉使藩府餽遺無所受晉御史視鹺淮南庫積贖錢三萬兩牒漕司以佐邊備賑得代出境行笥惟圖書故衣巡粵西典試事稱得人及經畧諸山砦撫勦事宜並中窾要出守泉州單騎赴任一老蒼頭相隨政暇延諸生談道藝泉故有河通城中如卦畫環學宮歲於久且盡炳如濬之明年庚午鄉試泉預解額者五十八人京闈閩兩解首皆泉人僉謂濬河之應轉兩浙運使入覲署上考爲天下治行第一賜金綺尚方食累陞陝西左布政使清操始終

有詩文集若干卷炳如尤有德於泉郡士建祠祀之此

西山梅溪云 見舊通志

曾朝節臨武人萬曆丁丑進士殿試第三人及第歷官禮部侍郎掌詹事經筵講官晉禮部尚書先後疏請遠僉任忍嗜好修人紀勵精政治凡十上累數千言上嘉納之克東宮講讀每因事導引必歸於道上嘗顧謂太子此汝社稷臣也疾卒上震悼諭祭葬贈太子太保諡文恪朝節廉靜雖踐華要而貲產未嘗有餘嘗構會館於京師爲湖南士大夫邸舍又於郡北建來雁塔以砥湘流置義田贍子姓立朝忠盡病劇猶手著釋解典觀全史以進所著有紫園草南國草易測書經正旨以第

朝符子廷棟為嗣廕補上林苑監丞 見舊通志

伍定相衡陽貢生事繼母孝能文章入南雍上安民定

亂十三策有旨報聞 見府志

謝如珂 詳義士志

歐陽顯宇 詳忠臣志

甯咸 詳文苑志

王萬善 詳文苑志

孫廷鳳 詳義士志

皇清曹國光未陽歲貢生博學有品見鄉人爭輒往平之
燕聖杉千株為隣火延燒殆盡隣人願償光慰遣之
其長者行類如此年九十六卒

周士儼字若思衡陽人順治甲午貢入成均屢試拔
萃選授內閣中書舍人陞典籍以書勅偶誤鑄級御
史李之芳疏論其枉奉

旨赴部具訊本末士儼終不自明引罪如初少宰王清與
大中丞高珩嘉之謂此一官者誠不怨不尤之君子
也照所鑄級補國子學正量移工部司務檢括舊皇
莊之隱漏以佐軍興兩計皆書上考以疾卒官 以上舊通志

永州府

東漢鄭產 水經注零陵先賢傳曰鄭產字景載泉陵人
也為白土嗇夫漢末多事國用不足產子一歲輒出口
錢民多不舉子產乃勅民勿得殺子口錢當自代出產

言其郡縣爲表上言錢得除更名白土爲更生鄉也

蜀漢劉巴蜀志列傳巴字子初零陵烝陽人少知名荆
州牧劉表連辟及舉茂才皆不就表卒巴北詣曹公曹
公辟爲掾使招納長沙零陵桂陽會先主畧有三郡巴
遂遠適交阯復至蜀先主定益州巴辭謝罪負先主不
責而諸葛孔明數稱薦之辟爲左將軍西曹掾後代法
正爲尚書令躬履清儉不治產業恭默守靜退無私交
非公事不言先主稱尊號文諸策命皆巴所作章武二
年卒按劉巴傳注零陵先賢傳曰巴祖父曜蒼梧太守
父祥江夏太守盪寇將軍明一統志以巴爲劉優長子
繆也又以劉敏爲優孫不知何據

黃蓋吳志列傳蓋字公覆泉陵人初爲郡吏察孝廉辟
公府孫堅舉義兵蓋從之拜別部司馬堅薨蓋隨策及
權擐甲周旋諸山越不賓有寇難之縣輒用蓋爲守長
石城縣吏特難檢御蓋乃署兩掾分主諸曹教曰兩掾
所署事入諾出若有姦欺終不加以鞭杖宜各盡心無
爲衆先久之蓋時有所省各得兩掾不奉法數事乃悉
請諸掾吏賜酒食因出事詰問兩掾辭屈皆叩頭謝罪
蓋曰前已相勅終不以鞭杖相加非相屈也遂殺之縣
中震慄遷丹陽尉抑強扶弱山越懷附蓋姿貌嚴毅善
於養衆每所征討士卒皆爭爲先建安中隨周瑜拒曹
公於赤壁建策火攻拜武鋒中郎將加偏將軍病卒於

官蓋當官決斷事無留滯國人思之及權踐祚追論其
功賜子柄爵關內侯

晉葉譚**楚紀**泉陵人清簡有節操至洛陽舉孝廉除郎
中拜太子舍人遷秘書監

唐屈隱之**姓譜**祁陽人少好經史尤精莊易舉秀才為
廣州判官兼攝司馬遷韶州刺史居官清儉請託不行
李邵延唐人**唐書**劉蕡傳太和二年舉賢良方正能直
言敢諫引諸儒百人於廷時第策官見蕡對嗟伏而畏
中官毗睨不敢取河南府參軍事李邵曰蕡逐我齒吾
顏其厚耶乃上疏曰陛下御正殿求直言使人得自奮
今蕡所對敢空臆盡言有司以言涉訐忤不敢聞自詔

書下萬口藉藉歎其誠鯁至於垂泣臣所對不及蕡遠
甚內懷愧恥自謂賢良奈人言何乞回臣所授以旌蕡
直帝不納邵後歷賀州刺史

五代何仲舉 詳文苑志

宋陶岳**楚紀**祁陽人太平興國五年進士累官太常博
士知端州余靖過端父老言前後刺史不求硯者惟包
孝肅及岳二人歷官四十餘年五為郡守有文集行世
周輔成明一統志道州人世居營道之濂溪登大中祥
符八年進士歷官多善政終於桂陽令累贈諫議大夫
子敦頤

周堯卿**宋史**列傳堯卿字子俞道州永明人天聖二年

舉進士積官至太常博士范仲淹薦其經行可爲師表
未及用始堯卿年十二喪父憂戚如成人見母則抑情
忍哀不欲傷其意母知而異之謂族人曰是兒愛我如
此多知孝養矣及母喪倚廬三年席薪枕塊雖疾病不
飲酒食肉旣葬蒸烏百數銜土集隴上人以爲孝感所
致爲學不專於傳注問辨思索以通爲期長於毛鄭詩
及左氏春秋有詩春秋說各三十卷文集二十卷子論
鼎州司理叅軍詵歸安主簿
何蓋姓譜營道人登政和八年進士性剛介議論不屈
倅隨守廉俱擅聲稱後守雅州亦以最聞

陳蓮 詳忠臣志

歐陽言楚紀營道人建炎二年登第性廉退任遷江令
嘗獲昌爵人陳椿以賞合改秩固辭不受後宰劇邑鞠
制獄愈有聲稱倅賓陽遷員外郎致仕故廬蕭然
唐開楚紀江華人建炎二年第進士通判廉州治績著
稱於時叔父貢常被誣憤死於獄開詣京師訴冤鄉人
高其義

李長庚明一統志寧遠人登紹興二年第歷仕五十年
廉潔有守不事生業惟蓄書數千卷號其讀書之室曰
水壺卒年八十有六有水壺集
樂雷發字聲遠寧遠人少穎敏無書不讀長於詩賦累
舉不第門人姚勉登科以讓第疏上理宗發策親試對

選舉八事稱旨賜特科狀元因數議時事不用歸隱雪
磯 見舊通志

義太初 詳文苑志

唐傑 詳孝子志

李文珍 詳孝子志

明周彝永明人好學善屬文永樂乙未進士初授行人
奉使交趾遷知雷州府起復補瓊州政尚嚴明而宅心

仁恕兩郡懷德 見舊通志

雷復寧遠人正統初進士由庶吉士歷官廣西副使藤
縣奸民構謠陷縣治與參將范信討斬之成化初以大
臣會薦擢山東右布政使七年徵拜禮部右侍郎尋改

右副都御史巡撫山西端恪守法得軍民心敗寇紅沙
煙再敗之煙寺溝石人村賜勅獎勞時山西大祲廷議
以陝西用兵令預徵芻餉轉輸榆林復上言自山西至
榆林道路險絕民齎銀往易價翔貴不免稱貸償責多
破產今雨雪愆違饑民疾病流離困悴萬狀而應輸綾
帛藥果諸物又不下萬計乞依山東例蠲除仍發帑賑
贍帝從之及發金三萬不足請鬻鹽四十萬引並令民
入粟授散官皆報可 明史稿

甯良明一統志 祁陽人賦性伉爽好學能文章正統乙
丑進士授行人歷官浙江布政使所至有聲績

吳禔明一統志 零陵人成化丙戌進士任監察御史振

湖廣通志 卷之五十一
肅風紀茂著激揚之聲陞參議參政克修厥職不畏權勢

熊繡道州人成化二年進士授行人奉使楚府巡查四川力拒魏遺擢御史巡按陝西發布政于璠罪帝怒下繡吏諭知清豐久之擢鳳翔知府弘治初遷山東左參政進右布政使七年以右副都御史巡按延綏初榆林屯兵備冬爲小堡景泰中始移巡撫總兵官居之遂爲西北巨鎮城隘弗能容乃徙千數百家於城外繡請增築千二百餘丈泄鎮數年練兵積粟邊政修舉歷兵部左右侍郎尚書劉大夏深倚信之騰驤四衛勇士額三四萬人率虛籍命繡清釐得詭冒者萬四千人時武宗

初立御馬太監甯瑾欲遠之乃擢右都御史總督兩廣既抵鎮盡裁幕府供億討平賀縣獍瑾深疾繡召掌南京都察院事尋罷歸卒巡撫秦金頌其清節於朝贈刑部尚書太僕少卿何孟春乞予謚遂謚莊簡並給其孫月米一石 明史稿

周璇字玉衡東安人成化丁酉舉人令武平值賊猖獗璇單騎詣巢推誠曉譬賊黨遂服兵荒相繼璇勤於撫字以最調柳城歸卒年八十七 見舊通志

周鵬楚紀永明人成化戊戌進士授刑部主事讞獄多所平反出守潮州築三利溪隄溉民田數千頃陞雲南參政卒家無餘儲

程溫明一統志祁陽人由進士任南京吏部主事陞南
京通政司參議逆瑾用事舊輔劉健謝遷皆罷溫草疏
將應求直言詔書忽內批致仕歸里家多藏書悉出送
費舍申嘉惠後學云

何天衢楚紀字道亨營道人游濂溪月巖山深悟先天
之學久之有得中弘治丙辰進士授嘉興令秩滿拜監
察御史彈劾無徇避巡諸邊鎮晝伺風角宵察景緯靜
籌樽俎動謹斥埃逆瑾用事達官貴人多出門下天衢
恥之遂遭廢錮瑾敗起守河南鎮守太監索七郡重貨
獨抗弗與遷陝西副使燭機防變申律令作士氣秦人
賴有寧宇轉浙江按察使晉布政使浙湖孽族爲亂天

衢兼撫勦平之宸濠不軌貴瑄畢正潛爲應天衢夙有
成筭正授首頒賞有差嘉靖紀元擢都御史巡視河南
鑛徒爲寇衆十數萬天衢克之晉工部右侍郎增祿一
品畱守南都值日精門災疏陳時政闕失上嘉納遷理
易州厰卒愍綸子卹子啟始四歲乃蔭其弟天衡

歐陽光永明人弘治己未進士令長洲調永新不善媚
權貴遂絕意仕進徜徉林壑垂十餘年

見舊通志

胡節楚紀零陵人弘治壬戌進士授行人拜監察御史
按山東忤逆瑾逮繫詔獄卒贈光祿少卿

朱袞楚紀永州人弘治壬戌進士選翰林院庶吉士拜
監察御史以忤逆瑾謫縣丞瑾敗起擢南京吏部郎中

出補雲南參議轉按察副使進參政為人樸茂善談論如湧泉懸河為文颺回峯豎人莫能測其底蘊

沈良佐明一統志零陵人正德戊辰進士任南京戶部

主事歷廣西左參政立心忠厚行事光明凡所至皆有

治績

陳薦祁陽人隆慶辛未進士選御史巡按陝西時三秦

荒早薦清贖緩得四萬餘金疏請蠲賑全活者甚衆歷

巡撫滇南操江留都皆有惠政晉工部尚書總督漕運

至吏部尚書卒年八十餘著古今衷辨百餘卷

周希聖零陵人萬曆己丑進士令華陽舊有宮扇之供

大為民困希聖出俸錢佐之猶不給為之不食而泣秩

滿擢山東道御史會有倍取宮扇之旨遂抗疏極言坐

謫灌陽典史以薦起太常丞陞南京戶部尚書魏忠賢

用事有訐希聖與楊漣深交者忠賢遂矯旨奪職忠賢

敗復起用希聖辭年八十五卒於家

以上舊通志

唐德明 詳忠臣志

陳純德 詳忠臣志

文明 詳文苑志

唐斌 詳義士志

楊成章 詳孝子志

盧奇 詳義士志

寶慶府

晉周崎 詳忠臣志

唐胡曾 姓譜 邵陽人天福間屢舉不第高駢鎮蜀引爲從事時南詔叛辭語不遜駢命曾撰牒諭之曰四方之於中國猶衆星之拱北辰百川之趨東海天地尚不能違况於人乎南詔屈服乞和等補寧遠令多惠政徙延唐請於朝復建舜祠著有安定集十二卷詠史詩百首

宋周儀 楚紀 武岡人雍熙初舉進士官至諫議大夫爲嘉祐直臣居家以邵陵田悉分給宗族子湛天禧中進士

王元春 姓譜 邵陽人慶元中進士初爲零陵令創建學宮置義產治多善蹟歷官吏部侍郎卓有清聲

明梁德遠 詳孝子志

劉敬 楚紀 武岡州人永樂辛丑進士由縣令擢御史遷山東副使練軍實核糧餉抑豪右不以夷險渝操罷免家居再起爲都御史未赴而卒

袁寧新化人正德丁卯舉於鄉任普安知州土官構害地方寧下車却其餽遺遂受約束普民德焉歸田後杜門掃軌自娛山水間 見舊通志

楊廷芳 楚紀 邵陽人天順庚辰進士授南京評事轉寺正多所平反仕至貴州僉事以疾歸講學於邑之東山號東山先生年九十八吟誦不輟人稱其年近百齡學長三絕

黃疏武岡州人天順己卯鄉舉任吏部司務性敏練有
守陞刑部員外郎雪冤甚衆

伍佐新化人弘治己酉鄉舉任河南府通判遷安寧知
州州民多寄戶影射徭役佐編籍申白宿弊頓除轉贛
州同知屬龍南寇警佐連搗山巢俘馘有功陞思南知
府勸農桑修學校以目疾乞休爲人廉介恬退所著有

文峯集

以上舊通志

康憲邵陽人明一統志幼孤事母雷曲盡其孝弘治中
以歲貢任廣元知縣嘉惠學校寬恤小民蠲串錢之弊
代逋乏之征九載歸田恂恂謙厚人有非義愧不以聞
治家有法尤敦嫻睦卒年八十四

唐鳳儀明一統志邵陽人正德戊辰進士授行人拜監
察御史出按蘓松再按浙江釋疑獄表忠節禁奢侈
紀肅然擢應天府丞進僉都御史巡撫四川值歲大饑
疏請賑濟全活無筭芒部跳梁時議征勦溇暑出師鳳
儀疏請息兵計擒沙保蜀人大悅陞左副都御史母艱
歸卒賜祭葬蔭一子

李中憲新寧人正德間以貢士任廣元令興學校卹災
獨飭軍衛賢聲茂著乞歸之日行李蕭然卒年九十有
五

楊和城步人以歲貢任梧州通判清稅課捕劇盜改判
澆州督勦有功遷劍州知州州隣麗江土官奪民田嚴

諭還之和性剛而愛民劔州人有竹溪遺愛集紀和善政

曹一夔武岡州人萬曆甲戌進士授行人擢監察御史巡長蘆山東鹽法條陳十二事著爲令甲再巡四川轉嘉湖兵備洗冤釐弊以激揚清濁爲先乞養親歸卒所著有虛白堂集

車大任邵陽人萬曆庚辰進士令南豐遇事敢爲時流寇亂後戶多逃亡邑民供廢田之稅大任力言於上官請聽民就便近買給得奏允行且符下他縣如大任請因遂薦陞禮部郎中出守福州時日本畔擾東南多警乃練軍實繕城隍首行常平社倉之法敘賚特優擢嘉

湖兵備副使創建仁文書院遷巡溫處參政以養親告歸所著有螢囊閣正續集四十卷嶠言六卷

劉應龍邵陽人萬曆間進士初令崑山以清簡理獄以精明摘奸裁運軍糧羨勤學校課試士民感悅行取擢御史奏減蘓州糧數萬石蘓人爲之立祠出按山西福建復按畿輔捐俸賑饑遷南京太常少卿告歸應龍尤深究性命之旨所著一得編傳於世

王尚賢邵陽人父歿事繼母盡孝以大父遺產讓其從弟領萬曆甲午鄉薦授將樂令革坊里陋規汰絕軍冒食改補蒼梧權稅無分釐溢額商旅賴之會派宗藩贍產尚賢按得軍田冒占者如數克之免奪民田數千畝

晉蘓州同知署長吳二縣篆撫武進亂民擒丹陽劇盜
置官田蘓漕累理冤獄尤以清節著聞所著有菴園集
二十餘卷

陳九鶴邵陽人萬曆己酉舉鄉薦孝友醇謹值歲歉鬻
產市米為淖糜數處人賴全活晚令嘉禾邑小而殘撫
綏煦育民賴保聚未幾告歸析田產之半以贍兄弟之
子以上舊通志

劉孔暉 詳忠臣志

盧大受 詳忠臣志

方觀 詳孝子志

王朝卿 詳孝子志

車大敬 詳義士志

簡而廉 詳孝子志

岳州府

明方昇明一統志臨湘人鄉薦第一舉進士性寧靜有
文行拜監察御史按治處咸著清直聲遷江西副使卒
官篋中惟衣服二三襲士大夫賢而惜之

劉綸臨湘人成化己酉舉人資性剛方知四川灌縣豈
第得民秩滿士民請於當道願借一年及歸民涕泣追
送祀名宦

方賓巴陵人弘治鄉貢性方嚴不苟言笑以義訓厲族
人終其世族無爭訟者正德間任鳳陽通判值山東盜

起督兵禦淮建靈壁虹縣二城賊至不得渡縱擊大破
之御史上平賊績詔旌異卒於任子啟泰河東都轉運
使啟念劍州知州

方鈍巴陵人正德辛巳進士累官戶部尚書時邊費浩
繁苦心調給六載所上章疏至數十萬言受知世廟立
朝正直忤權貴請假回籍築白荆楓橋二隄穆皇卽位
遣官存問卒贈太子少保諡簡肅

余坤巴陵人正德己卯舉人官監察御史奉使四川招
撫流民數萬坤爲人廉正尤以孝著有月田漫稿

姜廷願巴陵人嘉靖甲辰進士授餘干令擢御史遷淮
陽兵備副使是時取民無制江北尤甚廷願計郡邑必

費歲若干籍記之按籍征輸爲條編法自是大江以西
浙左右湖南北漸次舉行遂徧京省美意良法實自廷
願始之累官至兵部侍郎予告歸

白竹華容人萬曆庚戌進士官至建昌守以廉著改補
瓊州遷粵東提學建昌瓊州並祀名宦以上舊通志

楊一位詳孝子志

楊紹儒詳義士志

沈植詳義士志

常德府

宋管師復詳隱逸志

明馮貴詳忠臣志

鄧崙明一統志武陵人永樂甲辰進士歷兵科給事中
上疏選將帥練士卒汰冗官犒邊軍去積弊謹失機禁
侵漁嚴紀律貸貧匠徙達官凡十事坐忤出補長蘆運
使建議鹽課利害十餘事民商便之

文澍姓譜桃源人成化丙戌進士歷南京刑部郎中知
重慶府政尚寬平有古循吏風值歲饑請米萬石以賑
全活甚衆有劇盜嘯聚山澤諭之使復業盜感其誠信
卽解散澍富於學問爲詩文古澹有思致年躋耄耄手
不釋卷居鄉以禮法自律人稱篤行云

楊璠明一統志武陵人弘治壬子解元丙辰進士選庶
吉士歷刑禮兵吏科都給事中持正敢言忤逆瑾致仕

瑾敗起吏科轉通政晉南京太僕寺卿有疏稿詩文行

世

陳洪謨楚紀武陵人弘治丙辰進士授刑部主事累官
雲南布政使值習阿苗亂與都御史何孟春協心調度
督餉濟兵克平十八寨晉都御史巡撫江西修廢政汰
冗員纂輿志召入爲兵部侍郎掌部事運籌邊政益勵
清操卒贈兵部尚書賜祭葬所著有靜芳亭稿
龍琰武陵人正德戊辰進士令上饒改長樂以勤慎爲
政徵爲刑部主事能循法守

龍翔霄武陵人正德己卯鄉舉任閩中令轉知程番府
督建黔城能均勞逸恤夫役六年考滿晉中憲大夫仍

留三年竣城工任黔既久士民感德為立祠以祀

陳仲錄武陵人嘉靖癸未進士令新城有廖氏兄弟爭

訟十年仲錄取手足共械出入與居閱月感悟情好如

初葬暴骨數百棺歷刑曹益多平反除山東按察使告

歸

胡舜華武陵人嘉靖庚戌進士令興化禦倭有功歷官

布政司參議奉旨籍嚴嵩貲財一無所染家素貧所得

俸置義田以贍族無私利焉

龍德孚翔霄季子嘉靖戊午鄉舉授衛輝司理首復白

泉書院均屬縣徭役陞寧波府同知宦族奴僕倚勢為

暴悉寘諸法轉戶部郎中督權淮南以清白著謝事歸

里長詩文書法著對湘樓集德孚昆季四人並列薦紳

子三人襄孝廉負才名膺官太常京國學皆風雅夙譽

家門華顯云

陳思育武陵人嘉靖乙丑進士選庶吉士授翰林院檢

討與新安許國石首王喬桂切劘為古詩克經筵講官

轉贊善主應天試首錄無錫顧憲成一時稱得士世廟

實錄成陞中允大婚禮成進諭德主順天試陞少詹纂

修會典拜禮部侍郎致仕神宗念其講筵功多賜馳驛

歸

龍膺德孚之子萬曆庚辰進士授徽州府推官有清操

遷祠祭司主事歷陞甘肅參政以宿望召入為太常卿

江盈科桃源人少甘貧推祖父所遺田以與昆弟授徒自給除夕自郡歸道逢失金赴水者傾所携贈之得不死萬曆壬辰成進士授長州令縣苦京解諸役盈科爲置役田二千餘畝以資役費比賦勾校每寬其撲曰吾不忍見傷肌膚之效也秩滿遷吏部考功主事改大理寺正恤刑溘黔全活甚衆主試蜀中擢提學僉事卒胡永順武陵人萬曆丙辰進士任太平推官擢兵科給事直言敢諫疏劾時宰張彙督臣張我師黔帥張鳴鶴朝野震悚彈魏璫爲城狐社鼠御批具見忠愛然宵小側目旋告病歸懷宗立遷禮科都給事卒

以上舊通志

唐景 詳義士志

皇清楊震生武陵人以選貢授漳平知縣操守清白有治劇才民有積逋繫獄與設方計使得償而出之鍾兵據民產請逐兵而還民陞知德州

胡統虞武陵人前明進士選庶吉士陞檢討順治初詔授國史院檢討典直隸鄉試稱得人擢國子監祭酒講學彞倫堂以明善誠身爲要陞祕書院學士纂修實錄教習庶吉士以疾終宦橐蕭然門下士爲助葬丁學顯武陵人事母以孝聞順治辛卯登賢書任阜城令治劇有才兼攝景州士民頌其清操陳維國常德衛人順治壬辰進士任陽信知縣致仕歸家無宿春讀書好古工詩文年七十餘卒

劉昌臣常德衛人順治乙未進士初任刑曹恤刑正
定有孕婦寃禁洗釋之陞按察僉事提學山東雅意
作人每按試必引諸生羅立案側揭經義疏及爲文
法度口講指畫不少倦轉浙江糧儲參議大兵入闕
躬督運餉至嚴會土賊竊發留駐籌畫賊遂平一時
有兼資文武之稱卒於官

石鯨武陵人順治戊戌進士家貧力學博聞強記授
知灤州廉介有治聲 以上舊通志

劉體安武陵人制行篤實以歲貢生爲黃陂訓導著
祀典輯要其言禮器樂舞之制甚詳改補茶陵值草
賊陳丹爲亂體安唾賊大罵遂自刎不殊賊遁復甦

羅人琮字宗玉其鼎之子也第順治辛丑進士授寧
波府推官裁闕改朝邑令邑俗輕悍蠹胥莠民悉繩
以法而煦育其柔良有神君慈母之頌行取擢四川
道監察御史知無不言其所陳禁重耗策備荒勵風
節立勸懲籌鼓鑄薦舉人才纂修前史諸疏頻奉
俞旨尋告歸人琮篤於內行侍親疾衣不解帶者積旬遭
流寇亂兄弟四人逃避相失人琮膚皸足跣遍行求
之不獲白首追憶猶嗚咽流涕年九十卒
文鵠桃源人聰穎博學少時以試義通五經補諸生
老得歲薦司鐸永興課士一以道義多所造就以子
志鯨貴贈朝議大夫

辰州府

宋向正 詳忠臣志

明劉有年 楚紀沅州人元季自廬陵徙居洪武中以明經薦拜監察御史尋以辭秩養母罰通州輸站役偶從舊家得儀禮逸經十八篇上之上命付史館建文中起知太平府抑橫軍革黠胥去淫祠釐蠹政以儒術潤色吏治當塗人士多懷之靖難時以不迎駕謫戍雲南後平交趾起為按察司僉事卒於官

李景誠辰州人永樂戊子鄉薦任延平府同知平賊有功居鄉行事可法 見舊通志

蕭璆明一統志辰州衛人嘉靖癸未進士有才華精文

翰家貧克自振勵授吏部主事擢貴州提學僉事教範

嚴正乞休歸日與門人論學不倦

唐愈賢明一統志沅陵人嘉靖丙戌進士知寧海縣政教兼舉擢御史疏劾奸黨抗言時政遂乞休歸

滿朝薦 詳忠臣志

馬元吉 詳文苑志

鄧顯芳 詳孝子志

直隸澧州

明張浩澧州人景泰進士任工科給事中澧舊有運京白糧民苦之浩為奏免鄉人至今頌焉後從征交趾紀功還卒

龔天申澧州人嘉靖舉人萬曆初爲嚴州同知民有兄弟爭產訟十年不止者責令相拜於堂後月餘復有兄弟訟而兩人爲和解則前爭產兄弟也改補兗州開永濟新河便漕運受上方殊賞兗州祀名宦子錚舉鄉試孫之產萬曆庚戌進士之安以鄉舉爲蜀令死獻賊之難以上舊通志

皇清張舜齡詳孝子志

直隸郴州

唐劉瞻唐書列傳瞻字幾之其先出彭城徙桂陽舉進士博學宏詞皆中累遷翰林學士進承旨咸通中以中書侍郎同中書門下平章事同昌公主薨懿宗捕大醫

韓紹宗等送詔獄瞻上疏固爭即日賜罷俄斥廉州刺史貶驩州司戶參軍僖宗立復拜中書侍郎平章事瞻爲人廉約所得俸以其餘濟親舊之窶困者家不留儲無第舍四方饋獻不及門行已終始完潔弟助字元德性仁孝幼時與諸兄游至食飲取最下者及長能文辭喜黃老言年二十卒

孟瑄詳文苑志

宋曹靖楚紀邠人性孝友嘉祐中爲益陽令有善政去後民思累官尚書比部郎知賓州黃庭堅爲作善政頌稱爲御史嚴而不殘使民寬而不弛

杜唐卿姓譜字興宗宜章人元豐間進士調浮梁主簿

興學校芝生於學從之遊者三百餘人有善政百姓思之後累官司農

朱輅明一統志郴人紹聖間登第通判邵陽累折疑獄人以不寃後知郴獄無一死罪甘露降於州署前松樹逾月松下地猶潤人謂其善政所感

雷應春楚紀字春伯郴人嘉定丙子魁薦又魁禮闈以詩擅名累官監察御史首疏劾時相忤權貴出知全州不赴隱北湖後知臨江軍安靜不擾嘗欲城新淦以備不虞當路沮之及已未之亂臨江倉卒無備始服其先見所著有洞庭王虹日邊盟鷗清江諸集

陳純夫 詳文苑志

姚宋佐 詳文苑志

曹肅 詳文苑志

黃觀象 詳文苑志

明鄺子輔姓譜宜章人洪武初以明經任本縣訓導陞安福令不受改句容教諭所在咸立師範謝職教子埜成進士歷官陝西按察使嘗以俸錢易絨褐歸奉子輔大怒封還以書責之埜欲相見與僚友謀請為鄉試考官子輔知之復怒責之曰豈有子廉訪而父典文衡者乎其義方之訓耿耿如是故世稱埜賢必歸美于輔云黃茂楚紀桂東人洪武中貢入曹監才識通敏拜應天府尹修明政事振立紀綱

曹嗣宗楚紀郴州人少有志操建文庚辰進士初授四
川達縣令達故宕渠地嗣宗開創官府修六相樓祀唐
李嶠劉晏元微之李適之韓滉宋張商英太守嚴峻德
以廉能薦擢陝西按察僉事

朱光才明一統志郴州人永樂甲申進士歷官戶部郎
中綽有休聲陞陝西布政司參議

曹璉楚紀永興人宣德己酉舉於鄉初任嘉定州學正
儀矩峻整文學縝暢擢河南提學僉事以身爲教士習
丕變時于謙巡撫中州薦之遷陝西按察副使總理寧
夏邊儲陟大理少卿參贊延綏軍務謝事歸卒著有裕
齋集子佺字存之成化辛丑進士授南京大理評事補

雲南按察僉事大學士李東陽序其集

歐陽復楚紀桂陽人景泰辛未進士授兵部主事歷員
外郎出補泉州知府政平刑簡釋囚致雨卒於官百姓
立歐公祠祀之至今有禱輒應大學士彭時記云

王庭桂詩忠臣志

何俊明一統志郴州人成化己丑進士任南京戶部主
事擢雲南按察司僉事兼督雲貴學政隨俗化導濟之
以嚴凡所陶鑄皆中器使著有訥齋稿子說成化庚子
鄉試第一辛丑成進士歷刑部員外郎錄囚南畿多所
平反擢河南督學僉事學政修舉

鄧庠楚紀宜章人成化壬辰進士初授行人拜監察御

史疏陳八事上皆嘉納巡按陝西錄囚繫多所減宥有
編戍海南者道出宜章見閭表有庠名曰此活我御史
公也泣拜而去都勻苗叛所司請勦庠承命往視得苗
爭地讐殺狀詣賊巢諭降之遷河南副使歷陞右副都
御史巡撫河南劾鎮守太監廖堂弟鵬倚勢害民詔卽
逮捕陞戶部侍郎晉南尚書卒年七十七

朱守恕楚紀桂陽人父海正統乙丑進士江西按察僉
事守恕登成化壬辰進士授涉縣令改修武廉能剛毅
所至有聲擢南御史陞雲南僉事

崔巖明一統志郴州人成化辛丑進士歷戶部郎中山
東江西河南布政使擢左都御史轉南京工部左侍郎

卒巖生平稜峻不苟合居官三十餘年田園如舊云

曾全姓譜永興人成化丁未進士授戶部主事值星變

抗疏陳四事歸號碧潭居士築室授徒以詩文自娛

高蔭先姓譜宜章人成化丁未進士授行人奉使朝鮮

管伴來迎蔭先曰朝鮮稱王受命天朝王不來迎是與

王人抗矣王謝罪來迎後遂爲常陞御史發奸摘伏修


舉廢墜歷四川參議卒蔭先燕居如對賓客闔門若官

府交友言必信見人患難必思亟拯之

何孟春明列朝詩傳字子元郴州人弘治癸丑進士李

東陽異其才擬入史館以父憂罷授兵部職方主事歷

郎中補河南參政入爲太僕卿以僉都御史巡撫雲南



名爲吏部右侍郎世廟卽位詔議尊親禮大臣相繼去
位孟春率部院臺諫力爭泣諫於左順門上疏上撫慰
再四跪泣不起左遷南京工部右侍郎居無何盡斥諸
弗議者削籍錮不復用屏居著述有餘冬敘錄行世穆
廟初追贈禮部尚書賜諡文簡
范輅明一統志桂陽人正德辛未進士授行人拜監察
御史清軍江西忤寧庶人宸濠謫四川宣撫司經歷起
擢福建僉事江西副使宸濠謀反輅首撻其樂工殺之
誣繫獄除名事白復起山東副使陝西參政輅有氣節
歷官有能聲

直隸靖州

明夏必銘綏寧人洪武初以貢任湖州通判在官六年
清操如一催科不擾屢膺獎薦致仕歸以耕讀教子弟
以和敬勸鄉族周恤貧困化導橫逆卒年七十六見州志
宋以方詳忠臣志

張儒靖州人嘉靖戊子鄉薦官至兩淮鹽運副使孝友
著聞在官清慎

陳宗武靖州人嘉靖甲午鄉薦爲任郎令擢守通州時
邊警告急宗武勵精竭力料理芻糧以固根本通融買
辦以蘓民困嚴緝盜賊以靖地方修建新城以遏外衝
清查卒伍以肅軍政一膺欽賞八舉賢能
易鰲會同人名山知縣歷任九年清操特著卒於官民

湖廣通志

立祠祀焉以上舊通志

楊正恒詳文苑志

馬應乾詳文苑志

湖廣通志卷之五十

